

Friûl di Jevât

PAR CURE DA LA SOCIETÂT FILOLOGJICHE FURLANE

Vie Ascoli, 1, Guriza - tel./fax 0481533849 - gorizia@filologicafriulana.it - www.filologicafriulana.it


Pai 140 agns da la sô nassite, la Societât Filologjiche Furlane e à organizât un incuintri li da lis Cantinis Ca' Tullio par sabide ai 7 di Otubar

Tita Brusin, un fi di Aquilee

Giovanni Battista Brusin, Tita pai furlans, al è stât un grant archeolic, nassût a Aquilee tal 1883, cuant che Aquilee e la Contee di Gurize e Gardiscje a jerin sot dal Imperi dai Asburcs. Si declarave talian e iredentist, ancje se al pensave cun nostalgjie a la buine aministrazion asburgjiche dopo dal passaç di chestis tieris a l'Italie, finide la prime vuere mondiâl. Tal 1920 pre Celso Costantini lu clamà tal Museu Archeologic e di chel sodalizi a nasserin i progjets par puartà la sede da la Sorintendence a Aquilee e par tornà a meti sù il Patriarcjât (progjets che no si son mai realizâts). Dal 1922 e fin al 1952 al è stât diretôr dal Museu Archeologic, cundut che tal 1936 al jere stât nomenât Sorintendent aes oparis antighis e a l'art pal Friûl, la Vignesie e la Istrie cun jurisdizion su lis Trê Vignesii e su la Lombardia a Padue. Al è stât tra i fondadôrs, tal 1929, da la Associazion Nazionâl par Aquilee, president da la Deputazion

di Storie Patrie dal 1956 al 1963 e tal 1965 al diventà membri da la Academie dai "Lincei". Tai agns Cuarante dal Nûfcent al à voltât i siei interès viers l'arheologjie cristiane, dopo dai sgjâfs intes basilichis dal fonts Tullio e di Munistîr. Al è stât ancje autôr di publicazions e la sô prime vuide, la "Guida storico artistica di Aquileia", dal 1929, e je un riferiment impuartant ancjemò in di di vuê. La testimoniance dal so lavôr si le viôt massime intes colonis dal Forum di Aquilee, che Brusin al fasè tornà a fâ sù tai agns Trente dal Nûfcent, e tai sgjâfs dal puart fluvial e da la Vie Sacre, tacâts tal 1925 e finîts tal 1931. Fintremai dal 1955 al à vût colaborât al progjet di une leç speciâl par Aquilee, che e je diventade realtât ai 9 di Març dal 1967 cu la aprovazion da la Leç Speciâl pe tutele e valorizazion da lis zonis archeologjichis di Aquilee e da la vie Romee antighe. In chesta ocasion al diventave realtât ancje il so sproc: "si sgjave pal popul e pes

gnovis gjenerazions". Brusin al partecipave in prime persone a la vite culturâl di Aquilee e dal Friûl, e al tignive ancje i contats cul mont di lenghe todescje, che al cognosseve une vore ben in grazie dai siei studis tal Staatsgymnasium di Gurize e tes universitâts di Viene, Innsbruck e Graz. Par finî, no si à di disementèa la sô partecipazion in cualitât di conseîr di presidence da la Societât Filologjiche Furlane, li che al à contribuît a mantignî alt l'interès pe lenghe e pe culture furlane, lavorant ancje insiem cul so amî Ugo Pellis, di Flumisel. Al fo sapulît sul cricâ dal di al prin di Zenâr dal 1977, te criure e cu la nêf, daûr da la sô volontât. Pai 140 agns da la sô nassite, la Societât Filologjiche Furlane, in colaborazion cu la Societât Furlane di Archeologjie e la Deputazion di Storie Patrie, e à organizât un incuintri li da lis Cantinis Ca' Tullio di Aquilee par sabide ai 7 di Otubar aes 10 a matine. Dopo dai salûts di benvignût a cjaparan la peraule la



GIOVANNI BATTISTA "TITA" BRUSIN

dot. e Piera dalla Barba, gnece di Brusin, il prof. Maurizio Buora, il storic Giorgio Milocco, che al presentará un video di Renato Iacumin cun dentri une interviste a Brusin, e il prof. Ferruccio Tassin. L'incuintri al sarà moderât da la prof. e Luisa Contin in non dal Fogolâr Furlan di Aquilee e da la Societât Filologjiche Furlane.

Domenie ai 15 di Otubar si cjatîsi "di là dal Tiliment"



(FOTO DENIS SCARPANTE)

Congrès numar 100 a Montreâl

Il Congrès da la Filologjiche Furlane di chest an al sarà pardabon impuartant, stant che al è il numar 100 inte storie da la Societât. Si fasarà domenie ai 15 di Otubar "di là dal Tiliment", a Montreâl, in colaborazion cu la Aministrazion comunâl. La zornade e tacarà cu la messe in domo a lis 9 a matine, celebrade di pre Luca Crema e compagnade da la Schola Cantorum de Parochie di Sante Marie Assunte di Montreâl. A lis 10.30, tal Auditorium da la ex

centrâl idroelettriche di Malnîs, a tacaran i lavôrs. Dopo dai salûts dai sorestants, o varin ospit d'onôr Carlo Ginzburg che nus puartarà "A la scuvierde di Montreâl a travers la storie di un mulinâr dal Cincent", ven a stâi il Menocchio, che al fo brusât da la Incuisizion par lis sôs ideis ereticis. Al fevelarà ancje Francesco Chinellato su "La centrâl di Malnîs tal cuadri da la infrastrutturazion idroelettriche de Celine". Dilunc dal congrès a saran premiâts i vincidôrs da la XXI edizion dal premi

"Andreina e Luigi Ciceri", dedicât a voris sientificis su aspîts da la culture e dal teritori dal Friûl. Par finî al sarà presentât il Numar Unic "Montreâl", par cure di Aldo Colonnello, Alessandro Fadelli e Paolo Tomasella. Dopo dal gustâ in compagne, tal dopomisdî si podarà visitâ la antiche plêf di San Roc, Palaç Toffoli cul Museu archeologic e il percors di archeologjie industrial intes ex centrâl di Malnîs (par informazions e prenotazions tel. 0432 501598 int. 1, info@filologicafriulana.it).

Ai 3 di Otubar

Fumet animât

"Ti conti il Vaiont"

Puedial un dissen animât cuntâ une tragjedie? Isal pussibil pandi midiant di un fumet la storie di un disastri causât dal om? La rispueste si clame "Ti conti il Vaiont", la animazion di une "graphic novel" realizade de Societât Filologjiche tal 2022 par contâ, in mût delicât, sclet e semplic, ce che al è sucedût ai 9 di Otubar dal 1963, cuant che la mont Toc e je vignude jù provocant une ondate di passe 250 metris che e à sdrumât i paîs di Nert, Cas, Longaron e almancl altris cinc frazions cun cuasi 2000 muarts. Cuntun lengaç adat par fruts, zovins e granç, i dissens dal fumetist Paolo Cossini nus menin a la scuvierde da lis causis e da lis consequencis di chê che e je stade una da lis plui grandis disgraciis da la seconde metât dal Nûfcent.

Par memoreâ la vicende, la Filologjiche za cualchi an indaûr e veve inviât un progjet didatic pes scuelis e cumò, partint propit di chel progjet, e à fat ancjemò un pas indenant animant il fumet, che za tant sucès al veve vût come libri a stampe, par fâ cognossi no dome ai students ce che al è sucedût dongje di cjase nestre. In ocasion dal sessantesim inovâl de tragjedie, ai 3 di Otubar a lis nûf e vinci di sere, sul canal RAI 3 bis si podarà viodi pe prime volte chest fumet animât te version in lenghe furlane. Tai prossims mès al sarà metût in onde ancje il dissen animât par talian, simpri di bande da la sede regionâl de RAI pal Friûl Vignesie Julie. No dome, simpri tes stessis zornadis il Docuscuole, Centri Regionâl di documentazion pe scuele furlane da la Filologjiche, al promovarà la proiezion dal filmât pai students da lis scuelis di dut il Friûl.